

Bulitinu Infurmativu

Gioi, tu prota dzuuâ di Sumedru 2009, cumândâsearea Cunsillui Armânjloru (prezidentulu – Yiani Mantsu, sh-grâmâticlu ghegeneralu – Niculaki Caracota) avu unu uspets di lucru la Cunsillu ali Evropâ di Strasburg, aclo iu s-dizvârtirâ, kiro di unâ stâmânâ, lucrârli atsiljei ditu soni sesiuni parlamentarâ di estanu (patra sesiuni parlamentarâ).

Muabetsli tsi s-purtarâ cu parlamentarlji evropianji la aestâ sesiuni furâ ma multu ti problema catastsiljei murmintsâloru armânjloru ditu hoara Bela / Bosnia – Hertsegovina, hoarâ iu bâneadzâ unâ comunitati di arâzgâ armâneascâ.

Aua sh-doi meshi, Cunsillu Armânjloru apruke di la Dimitri Grebeniti, prezidentulu a sutsatâljei „Lunjina“ di Belgrad, sutsatâ tsi easti membrâ tu CA, unu materialu infurmativu mutrindalui aestâ znjii tsi s-fatsi Bela cu murmintsâlji armânjloru.

Tu hoara Bela ditu cratlu Bosnia-Hertsegovina, districtulu Brcico – parti tsi easti sum administratsiuni evropianâ (EU) – bâneadzâ unâ comunitati di arâzgâ armâneascâ, protslji armânji agiumsîrâ aclo nica ditu kirolu a Turcului, cându Pâshelu di Bosnia-Hertsegovina, acljimâ armânji tu aesti locuri ta s-mutâ putearea icunomica shi s-andrupascâ ligâturli di imburlâki anamisa di amirâria nturtseascâ sh-atsea austro-ungarâ.

Tu aestâ hoarâ, iu s-aflâ trei grupishti(mirmintsâ) crishtini, armâneascâ, sârbeascâ sh-croatâ(catolicâ), cumândâsearea bâsearicâljei ortodoxâ(sârbeascâ) deadi cali ta s-hibâ surpati murmintsâlji armânjloru, locuri tsi s-hibâ loati di bâsearica sârbeascâ. Ti furnjia alushtuiu actu di violentsâ, ti nipistipseari, aestâ comunitati di Bela, s-plâmsi la guvernulu localu.

Unâ sintezâ ditu materiallu infurmativu tsi lu-aprukemu, fu andreaptâ sh-dipusâ Strasburg la ma multi dipartamenti : la Comisarlu ti Ndrepturli a Uomlui di la Cunsillu ali Evropâ – Thomas Hammarberg, la Comisiunea Culturalâ, la Secretariatlu a Prezidentului CE – Lluis Maria de Puig, la Comitetlu ti Ndrepturli a Uomlui – iu s-purtarâ muabets ti aestâ catastisi sh-cu vitseprezidentulu. Materiallu infurmativu ti catastisea a grupishtiljei veaclji di Bela âlj si deadi sh-a raportorlui evropeanu rispunsabil ti cratlu Bosnia-Hertsegovina, idyiulu materialu va hibâ pitricutu sh-la comisiunea di monitoridzari di la Cunsillu ali Evropâ.

Tu idyia dzuuâ di uspetsu, alti muabets s-purtarâ sh-la Directoratlu Gheneralu ONG, aclo iu Cunsillu Armânjloru dipusi tu Apriiru, estanu, cârtsâli ta s-hibâ aprukeatu ca OING (Organizatsiuni Internatsiunalâ Non-Guvernamentalâ), cu harea / tesa di „Participatory Status“, la Cunsillu ali Evropâ, sh-di iu s-ashteaptâ, pânâ tu ishita di Andreu, apofasea finalâ.

Cunsillu Armânjloru(Makedonarmânjloru)
Biroulu di Cumândâseari

tu 08-li di Sumedru 2009

(Bulitinu Infurmativu Nr.13)